

Bosnia eta Krajinako aldeak bilduko ditu Europako Batasunak astelehenean

Atzerri ministroek Jugoslavia ohiako pausoz pausoko egitasmoa adostu zuten atzo

Europako Batasunak Bosnian aurrez aurre dauden alde guztiekin batera ekimen diplomatiko berria jarriko du abian, atzo Luxemburgen bildutako Atzerri ministroek onartu zuten. Halaber, bake akordioa mesedetuko duelakoan, Serbia eta Montenegroren aurkako zigorrak apurka arintzea erabaki dute.

LUXEMBURG

Europako Batasuna osatzen duten hamabi herrialdeetako diplomazia buruek ezohizko bilera deitu dute datorren astelehenerako: Geneban bildu nahi dituzte Bosnia-Herzegovinan eta Kroaziako Krajinan gerran ari diren alde guztiak eskualde hartarako prestatu duten ekimen berria abian jarri eta laguntza humanitaria desblosatzeko saioan.

«Astelehenean aldeak akordio politikoa hitzartu eta militarrek pasabide humanitarioak irekitzen badituzte, Nazio Batuetako indarrek ez dute dudarik izango hauek babesteko indarra erabiltzerako orduan», adierazi zuen atzo Willy Claes Belgikako —Europako Batasuneko lehen-dakaritza du seihilabeteko honetan— Atzerri ministroak. Ildo honetan, azaroaren 18an hiru aldeak hitzartutako akordio humanitarioa betetzen denentz adi egongo direla ohartarazi dute Hamabiek.

Baldin eta konboi humanitarioak gerarazi eta haien jarduera oztopatuz gero, indarra erabiliko duten mehatxua egin dute Hamabiek inoiz baino gogorrago. Hala ere, «konboien bidea ziurtatzeko aurrez akordio politikorik ez badago» ekimen militarrik ez dela izango ziurtatu zuten atzo. «Behin akordioa hitzartu ostean, in-



Bake prozesua bultzatuz gero zigorrak arinduko zaizkiola jakinarazi diote Hamabiek Serbiari.

EFE

dar erregular eta irregularrek Nazio Batuetako indarrak izango dituzte aurrez aurre, lehorrean edo airez», gaineratu zuen Javier Solana Espainiako diplomazia buruak.

Atzo adostutako egitasmoak bi zati nagusitan banatzen da, politikoa bata eta humanitarioa bestea, eta Balkanetako irtenbide orokorra bilatzerako orduan ekimena Europako Batasunarena dela agertaraztea du helburu nagusi.

Asmo honi ekingo diote astelehenean Genebako bileran. Bertan izango dira Europako Batasuneko hamabi Atzerri ministroak, Europako Batzordea, aurrez aurre dauden hiru aldeetako buruzagi politikoa eta militarra, eta Errusia eta Estatu Batuetako ordezkariak.

Mahai gainean auziaren gerturatze orokorra eta pausoz pausozkoa jarriko du Europako Ba-

✓ **Konboi humanitarioak gerarazi eta haien jarduera oztopatuz gero, indarra erabiliko duten mehatxua egin dute Hamabiek.**

tasunak: Lehen fasean, Bosnia eta Krajinako auziak konpondu asmo dituzten Bruselak Serbia eta Montenegrori zigorrak arinduz honek bake prozesua bultzatuko duelakoan.

EB SERBIARREI KEINUKA

Bigarren urrats gisa, Serbiako Voivodina eta Kosovoko eskualdeetako (Serbiako eskualdean egon arren, herriar gehienak ez dira serbiarrak bi zonalde hauetan) auziak kon-

pontzeko Konferentzia deituko litzateke. Azkenik, Bosnia berreraikitze eta Serbia berriz nazioarteko komunitatera biltzeko Konferentzia deituko lukete.

Europako Batasunak keinu garbia egin dio Slobodan Miloseviceri: «bake prozesua bultzatzearen truke, ezin izango ditugu zigorrak berehala altxatu, baina bai apurka arindu». Halaxe ohartarazi nahi izan zuen atzo Douglas Hurd Erresuma Batuko Atzerri ministroak.

«Itxuraz Europako Batasunak izan duen jarrera aldaketak» kontent utzi du Radovan Karadzic Bosniako serbiarren burua. «Europako Batasuna Jugoslavia ohiko gertakarien erantzule gorenaren izan da, eta hortaz bakea lortzeko egin behar dituen ahalginek ere handiagoak izan behar dute», adierazi zion atzo psikiatra serbiarrak Belgrad irratia-ri.



Andrei Kozirev.

daketa arrazoitzeko aitzakia-tzat. Andrei Kozirev Errusiako Atzerri ministroak Armeniari egotzi zion atzo gertakari haien erantzukizuna, eta horrelako saioetan jarraituz gero «neurri gogorragoak» agindu beharko dituela ohartarazi zuen.

«Ziurrenik, aurrez aurre dauden aldeak, Armeniak bereziki, gaintitu egin dute muga, eta Errusiaren interes nazionalak kalte handia egin diezaiekete», adierazi zuen Kozirevek «Errusiak negoziazioaz gain bere interesak defenditzeko beste bide batzuk badituela» gaineratu aurretik.

Ekuatore Ginean herenegun eginiko hauteskunde eguna «lasaia» izan zen

MALABO

Ekuatore Ginean herenegun Legebiltzarrerako egin ziren hauteskundeetan partaidetzari buruzko datu zehatzik oraindik ez badago ere, hiritar gutxi hartu zuten parte Javier Solana Espainiako Atzerri ministroaren iritziz. Ekuatore Gineako Gobernuak zenbait kideren ustez, oster, jende askok hartu du parte eta «lasai-lasai, inolako arazorik gabe» igaro zen hauteskunde eguna. Hauteskunde horietako emaitza azaroaren 29an jakinaraziko dute eta hautatutako diputatuak abenduaren 2an izendatuko dituzte.

Javier Solana Espainiako Atzerri ministroaren esanetan, «garantia bako prozesurik onartzen ez dutela adierazteko asmoz» jende gutxi eman du botoa. «Partaidetza baxuarekin aniztasun garantiarik ez duten hauteskundeetan alde ez dutela egiterik nahi adierazi dute Ekuatore Gineako hiritarrek», gaineratu zuen Solanak atzo Luxemburgen.

Miguel Oyono Ekuatore Gineako lehen ministroorde eta Abeltzaintza eta Arrantza ministroaren esanetan, oster, «botoa emateko eskubidea duten herritarren % 80k hartu dute parte igandeko hauteskundeetan, atzerriko iturriek esan dutena baino askoz gehiagok». Horri lotuta, eta Oyoren adierazpenekin jarraituz, Malabon eta Batan hautesle gutxi parte hartu izanaren irudipena aurreko hauteskundeetan baino 20 hautes-mahai gehiago jartzeak sortarazi du.

Partaidetzarekin jarraituz, eta Julio Ndong Ela Ekuatore Gineako Hauteskunde Batzorde Nazionalako lehendakari eta Lurralde Administrazioako ministroak atzo adierazi zuenez, Rebolan «ez da esan den beste jende abstenuitu, izan ere, partaidetza zenbaterainokoa izan den jakiteko botoa emateko eskubidea dutenen kopurua hartu behar da kontuan eta ez herritarren kopurua. Rebolan 1.031 hautesle daude». Bioko probintziaren iparraldean, Baney barrutian, «bubi askok ez dutela botorik eman» aitortu bazuen ere Ndong Elak, «bubi herria abstenuitu egin denik ezin da esan», gaineratu zuen ondoren.

Armenia baztertu eta Azerbaidjan babestu du Errusiak

MOSKU

Armenia eta Azerbaidjanen arteko gerrari dagokionez, Errusiak 180 graduko aldaketa eman zuen atzo. Armeniari eskaini ohi dion babesa ezbaian jarri du Kremlinek, eta haren aurka indarrezko neurriak agindu ditza-keela ohartarazi du gainera.

Errusiako agintarien jarrera aldaketa Geidar Aliev Azerbaidjaneko lehendakariak apurka landutakoa da. Abulfaz Eltxibei Turkiaren aldeko lehendakaria bota eta agintea eskuratu zuenetik, Alievrek ez du Errusiarekiko jarrera ezkutuan gorde. Moskura gerturatze saioan, Azerbaidjan

Estatu Independenteen Komunitatean (EIK) sartzea erabaki zuen lehen urrats gisa.

Orain artean Armenia Errusiaren aliatu leialenetakoa izan da. EIKn sartu zen Kremlinen nahiei jarraiki, eta bertatik proposatutako aliantza eta akordio guztiak sinatu izan ditu, Azerbaidjanek ez bezala.

Oraindik Armenia «estatu laguna» dela adierazi dute Moskutik, hala ere baztertu egin dute Azerbaidjanen mesedetan. Bi herrialdeen arteko mugan gertatuko enfrentamendua (alde bakoitzak gertakizun honi buruzko azterketa ezberdinak egin ditu) hartu du Errusiak jarrera al-